

# Nossa claustra

Autor(en): **Müller, Iso**

Objektyp: **Article**

Zeitschrift: **Il glogn : calender dil pievel : annalas per historia, litteratura e cultura romontscha**

Band (Jahr): **2 (1928)**

PDF erstellt am: **27.07.2024**

Persistenter Link: <https://doi.org/10.5169/seals-881320>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.



# Nossa claustra.

Maletgs ord nossa claustra. (Da P. Iso Müller O. S. B.) Compariu en il „Sonntag“ cun il tetel: „Mein Bergkloster“ ed en franzos sco Feuilleton della: „Croix Fédéral.“

Quasi sisum la Surselva grischuna, en in bi rudi de montognas e pézza, sin spunda sulegliva, ruaussa sco ina regina la claustra de Muster. Ils liungs mirs alvs surmontai da dubla tuor, miran serius giu ella val, nua ch'il giuven e selvadi Rein stauscha tut a buffond sias undas.

Spel Rein, nu'eis ei bein pli bi?  
Mo buc spel Rein de vossa Musa!  
Miu Rein grischun ludar jeu vi:  
El va per via zun carpusa  
Sper cresta-tgiet, ch'ei sia spusa  
Fideivels cuolms ein siu ani.

(P. Maurus Carnot)

Sco il spirtus Montalembert remarca en sia historia monastica digl occident, han ils paders de Muster conquistau gia bunamein sper sia fontauna e benediù el, il Rein, che bogna cun sias undas plaun e plaun ils mirs de tonts sanctuaris.

Igl ei stau dal temps che sogn Columban ei pelegrinaus atras nossa tiara. Mo duas claustras san pretender e segloriar, de derivar aunc ord ses dis, e ded esser perquei lunsch entuorn las pli veglias colonias claustralas: S. Gagl e Muster. Omisduas claustras numnan sco onn de lur fundaziun 613 ne 614.

Mo con malsemiglionts ei lur renum! — S. Gagl! Mintga buob che va a scola sa raquintar dad ella. Muster! In num svaniu, emblidau. Mo buca de smerveglier! Lein dar in'egliada en miu cudisch claustral! 5 gadas ha la flomma destruiu tut senza misericordia entochen sin paucs fegls. Mo ils paucs, sogns fegls, spindrai dal temps vergau laian silmeins sminar nus, tgei Muster ei stau inagada ne ha tonaton stuiu esser. En sia posiziun atgna sco claustra montagnarda astga Muster sequintar vengonzamein ella retscha tarlischonta dellas veglias claustras: S. Gagl, Reichenau, Fulda, Murbach,

Nossadunnaun, ed aschia vinavon. Buca mo perquei ch'ella survarga bunamein tuttas ella vegliadetgna, mobein era perquei ch'ella ha ligiau ensemen en in bi tschupi ina gronda lavur culturala entras sia missiun historica, malgrad che quella ei pér els davos onns puspei vegnida descuvretga e valetada.

Igl ei zuar pauc, quei che miu cudisch claustral raquenta a mi de gronds possess e pussentas domenas, mo ton pli bia sa el raquintar dalla carezia fideivla dil pievel montagnard romontsch, che ha adina priu art e part della legria e tristezza de sia claustra. Nus udin nuot d'in grond plan de baghegiar la claustra, sco in tal ha fatg renomada la claustra de S. Gagl dil 9. tschentaner, bein aver da excavaziuns ord il 7. ed 8. tschentaner, che ein, per gronda part mo denter umens della scienza, enconuschantas sco enzatgei, ch'ins anfla buca duas gadas. Buc in Reginbert, sco en la claustra de Reichenau, ha surschau a nus in liung catalog della biblioteca claustrala dil temps-miez, buc in Otfried de Weissenburg stat screts en nossas annalas cun lettras d'aur. E tonaton ha la claustra montagnarda senza dubi giu il 9. tschentaner ina gronda biblioteca, ed era nos paders han dal temps, ch'ils germans ein imigrai en la Rezia, translatau igl evangeli e perdegau. Gie ella umbriva della claustra ein per part la literatura ed il lungatg romontsch carschi si e vegni gronds. Nums tarlischonts sco quei che Notker, Tutilo ein en l'istoria dil choral, enconuscha la historia de nossa claustra buc, mo ella lai tuttina saver, che la psalmodia romana hagi era sanctificau las rivs dil giuven Rein dal medem temps, curch'ella ha resunau ella cella da sogn Gagl, forsa per l'emprema gada ella Helvezia.

Muster ha tarmess negin Alcuin alla cuort imperiala; persunter ha bein enqual im-



peratur spluntau vid la porta claustrala e dumandau albiert, curch'els mavan sur ils cuolms encunter miezdi.

Aschia stat nosssa claustra, sc'ina custei-  
vla pedra, zuppada el ravugl digl mund alpin  
retic, protegida dagl itschal dils glatschers,  
nunviolada dal  
splenghiem e dal-  
la puorla dil  
mund. Sche la  
historia duei ra-  
quintar a nus  
dals paders, che  
han luvrau ed  
urau sut il tetgal  
de quella claustra,  
dals mirs della  
claustra, che han  
resistiu aschi sa-  
vens en temps  
vergai e de pli  
niev datum als  
stempraus, lu  
astg'ins era scri-  
ver suravi ils  
vegls plaids be-  
nedictins: Ut in  
omnibus glorifi-  
cetur Deus! Per  
che Dieus vegni  
glorificaus en tut!



Las guardias della claustra.

### 1. Emprema fluriziun.

In iester ha tschentau avon pli che 13 tschantaners siu fest de pelegrin sin nosssa tiara retica. Ord la dira scola de s. Columban, eis el vegnius tras l'Ursera sur il Crispalt tier las rivass dil giuven Rein, amiez igl uaul gigantic che cuvrevva da gliez temps la vallada. Cheu nua cheduas vias mavan ina sur l'otra en ina largia digl uaul, ha sogn Sigisbert baghegiu ina cella, ella quala el voleva survir tgeuamein a Diu. Mo gleiti ha el anflau scolars, ed ual igl emprem e meglier de quels, sogn Placi, ei medemamein sededicaus a Diu ed ha gidau siu bab Sigisbert a fundar sia claustrretta. S. Sigisbert e sogn Placi, els han benediu e sanc-

tificau la tgina della casa de Diu. S. Placi, mazzaus dal präses della tiara ord schalusia ne ranveria, ha entras siu marteri bugnau las ragischs della plontaziun claustrala, che sogn Sigisbert aveva en tutta fideivladad sco confessor plantau ella tiara retica.

Mo strusch fu-  
va el fundaus, ei  
il sanctuari el  
stgir uaul de pe-  
gns vegnius tuc-  
caus da grevas  
disgrazias. Sur  
il pass, che mava  
sper la claustra  
vi, ein prigulus  
pelegrins vegni  
neutier. Roschas  
avars ein entuorn  
igl onn 670 vegni  
sur il Lucmagn,  
che fuva mo 4  
uras naven. Ed  
els ein era buca  
se reteni avon la  
porta della clau-  
stra. — Quels  
hosps maltschecs  
han sturniu igl  
avat Adalbero  
cun ca. 30 paders  
ed han dau fiug


la claustra. La giuvna fundaziun ei vegnida stenschentada en saung e flommas.

Miez d'in tschantaner ei spiraus. Il sem, ch'ils sogns fundatur della casa de Diu havevan en leda cardientscha surdau alla tiara retica e che aveva aunc strusch entschiet a pruir, ei puspei vegnius smaccaus afuns. El ha fatg ussa in sien el tgeu uaul montagnard, rimnond novas forzas, entochen che finalmein sogn Ursicin ha puspei alzau siadora el cun maun plein carezia e quitaü e menau el encunter l'emprema fluriziun. Il sogn uestg ed avat Ursicin (754) il secund fundatur della claustra, ha giu la legria, de saver erreger la claustrretta d'avon aunc pli gronda e biala. Lu han ins baghegiu treis



baselgias: en honur de Nossadunna, de sogn Martine e de sogn Pieder. Carl Martell ha schenghegiu il grond uaul regal, che circumdava Muster ed igl uestg de Cuera, Tello, ha aunc mess vitier (765) possessiuns pli vastas. Ins ha fundan colonias egl uaul ad Ursera ed el Tessin superiur, runcau ora runtgas ed augmentau las pradas. Lu, dal temps della renaschientscha carolinga, (fin digl 8. — lunsch viaden el 9. tschentaner)

de scarvonts e la biblioteca conteniu grondas collecziuns. Fuvan gie schon avon l'atacca dils avars (che ein per sbagli tochen ussa vegni numnai tier nus: ils hunns — vide Muoth) 2 Evangelis e 9 codices vegni spedi en tutta prescha a Turitg. Mo igl ei de star mal, che ils tschun incendis della claustra, 670, 1387, 1514, 1799 e 1846 han tenu casa taluisa, che la claustra posseda malgrad sia vegliadetgna buc in codex pli. Ton pli



Ord la veglia biblioteca claustrala (codex dil 9. tschen.)

ha ina gronda, en enqual grau la pli gronda, flurizium culturala entschiet per Muster. Sut il tetg claustral viveva ed urava ina gronda famiglia monacala, sco ins vesa ord il cudisch confraternal, entschiets 826 a Reichenau. Viers la fin digl 8. tschentaner dumbrava il convent ca 70, gleiti suenter ca 100 comembers. Depi sogn Ursicin suandavan quels ils tschentaments inspirai da moderaziun e migeivladad da sogn Benedetg enstagl la regla de sogn Columban che fuva quasi apatica als germans. Sco autras claustras reticas po era Muster haver giu ina scola

prezius ein perquei aunc enzaconts cudischs della biblioteca claustrala a Muster ord il temps-miez, che sesanflan p. ex. ellas bibliotecas de S. Gagl e Nossadunnaun. Aunc pli pauc che dals cudischs eis ei restau dallas possessiuns. La claustra de sogn Sigisbert possedevas talas probabel gia egl 8. tschentaner ella Lombardia (Lommellina), e quellas ein vegnidadas arrundadas dal tut el 12. tschentaner. Aschia ha la detga priu sia entschata, ch'igl avat de Muster sappi sin siu viadi a Ruma durmir mintga notg en sia atgna cuort. En verdad engrazia la claustra sias possessiuns



per gronda part a sia situaziun sper la via dil Lucmagn, che ei gie il pli bass de tuts pass dellas alps centralas. Dad ina vart havevan ils retgs adina quita de segirar quei pass alpin e da l'otra vart ha nossa claustra adina fatg siu pusseivel, de senezigiar de quella situaziun. Bien e baul schon han ils paders erregiu plirs hospezis dalla vart meridionala giu entochen Blizuna. Per bein en qual pelegrin en la puorpra regala ein las portas sesaviartas hospitalmeîn: Otto I igl onn 965, Heinrich II igl onn 1004, Fridrich I igl onn 1164 e 1186. Igl albiert gudiu remuneravan ils aults hosps il bia cun considerablas donaziuns. Interessanta ei en quei grau la confirmaziun ed augmentaziun de tuttas possessiuns meridionalas, era de quellas che fuvan giuridicamein malsegiras, entras Fridrich I, dagl onn 1154. Quei document munta en sesez nuot meins che la culminaziun della pussonza politica dil stadi abbazial dils pass.

Igl avantatg che Muster gudeva da sia situaziun spel pass dil Lucmagn, ei svanius pli e pli, curch'il transit ei ius el 12. e 13. tschentaner sur il pass dil s. Gotthard, che menava en ina cuorta val latitudinala, enstagl en ina val longitudinala, sco il Lucmagn. Schegie che quei niev pass ha giu mo influenza indirecta sin la claustra, entruidan tonaton ils hospezis a Tschamutt, Hospental e surtut igl enconuscent hospezi sil s. Gotthard sez a Muster; els tuts ein fundaziuns dils benedictins de Muster. Politica ha la claustra aunc ditg fatg culs pass, ella ei schizun vegnida en carplina cugl uestg de Cuera, cu quel ha el 14. tschentaner vuliu paralisar il traffic sur il Lucmagn en favur dil Septimer. Ed era els davos tschentaners han ils paders ord medemas raschuns erregiu hospezis, punts etc. mo las meglieras periodas dil temps-miez eran vergadas, ellas qualas la claustra vaveva sco claustra de pass e garanta per il traffic.

Suenter il 12. tschentaner ha il vegl stadi claustral dils pass, sch'ins astga numnar el aschia, buca giu pli bia temps favoreivels. Las possessiuns da vart meridionala ein per

gronda part vegnidas darsentadas ed il diember dils paders fuva, sco en las biaras claustras dil temps-miez, pigns. Ord las stgiras umbrivas della decadenza externa ed interna de lu della claustra, passan zuar las figuras tarlischontas e noblas d'in s. Adalgott (ca 1150), avat de Muster ed uestg de Cuera, plinavon d'in avat Thüring d'Attinghausen (morts 1353), che ha scret entuorn il choral per la claustra el sistem de notas guidonic. Ils avats Johannes IV, Pieder de Pultengia (1402—38) han era capiu entras prudenta suatientscha de prender l'aria ord las tendas dil moviment de libertad, svegliaus ella tiara. Gie, avat Pultengia ei tochen ussa restaus in um carezau dil pievel, havend el gidau a fundar la Ligia Grischa de 1424. El viva vinavon en poesia e detgas. Era finanziamein fuva la claustra auuc buca schi datier alla ruina. Mo tutina, temps tarlischonts eis ei buca stau. Ils megliers dis per la tgeua claustra els cuolms ein quels stai, nua che retgs ed imperaturs, che vulevan ir sur il Lucmagn, han spluntau vid la porta claustrala e domandau albiert leu.

## 2. Rinforzada el stemprau.


„Il ruver vegn rinforzaus el stemprau“, aschia ha in cronist scret el cudisch della claustra. Gie, ruvers e paders ein immortals, completescha il grond Lacordaire. In mussament persuenter porscha la historia de nossa claustra ord ils tuorbels temps dils combatts de cardientscha. Bein eis ei in feagl ualti tartignau ellas annalas della claustra: igl avat cun treis paders han bandunau claustra e cardientscha. E suenter ha il cumin della Cadi usurpau il dretg, de occupar l'abbazia tenor agen beinplascher. Igl ei vegniu schi lunsch, che ils „Cusseglers“ de Muster han anflau negin auter pli igl onn 1551 sco avat, che in premonstratenser de S. Leci a Cuera, che ha priu possess della prälatura per la paga ded in gulda per meins. Pér al successur, Christian de Castelberg eis ei reussiu, de puspei far bien in ton dil donn de ses antecessurs. (1566—84) — En in sulet di ha



el perdegau en tshun pleivs, per che la cardientscha dils babuns piardi buca siu vegl dretg de burgheis cheu en la val retica. El vegn perquei numnaus cun raschun, „il Borromão della Rezia“. Quei tonpli, che s. Carli ei sez pelegrihaus 1581 a Muster, nua ch'el duei esser passaus cun peis bluts en baselgia Nossadunna. Mo malgrad la lavur digl avat ha la claustra buca pudiu arrivar tier ina nova fluriziun, aschiditg sco las au-

era Gallus de Florin (1716—24), en lur ideas e miras.

Ils avats della reforma, Christian ed Augustin, stattan naturalmein sil fundament dil Concil de Trient, che ha gie svegliau novas forzas vitalas en igl uorden ed en l'entira baselgia. Quei ei la reformaziun catolica, che ha era giu en consequenza per part igl art e la cultura grondiusa e libra dil baroc. Dal tutina figura de quei temps della renaschien-



Mustér avon 100 onns

toritads civilas han occupau la prälatura. Quei muossa sufficientamein clar igl antipod de Christian, igl avat Sebastian della medema schlatteina, mo de tut auter che medemas qualitads. Pér cun agid della nunziatura papala e della congregaziun benedictina svizzera eis ei reussiu ad Augustin Stöcklin (1634—41), malgrad tuts stighems encunter el, de recuperar la zun necessaria libertad e de sclarir si il pievel surmenau da ses menaders. Avat Augustin, che ei insumma ina figura ideala per in avat de Muster pervia de siu spert e sia scienza benedictina, ei vegnius imitau dals avats Adalbert II de Medel (1656—96), ed Adalbert III de Funs (1696—1716), sco

tscha catolica ei avat Adalbert II, che ha studiau a Nossadunnaun e Ruma, ed ei strusch ornaus cun las arbagias della s. Teologia, vegnius tschentaus alla testa dil convent. Sia ovra, il niev baghetg della claustra, che fuva pertut sgurdinada, vegn aunc ad occupar nus en la historia dil baghetg. Fina scola ed educaziun tradescha sia corrispondenza cun Mabillon, igl ual aschi devozius sco scolau Mauriner. Adalbert ha era fatg sez diever della plema, per sustener siu lungatg matern romontsch, e la stampa claustrala fundada dad el ha giu ina gronda impurtonza. Sut il tierz avat de quei num ei la baselgia gronda della claustra vegnida consecrada.





Its huns a Muster.



1712). — El ei enconuschents sco il „Mabillon della claustra“ surtut entras sia historia della claustra, en siat toms, che ei en consequenza digl incendi de 1799 avon maun mo en in excerpt pli. Adalbert ha era gudognau possessiuns ella Val Tellina, nua ch'ins ha pli tard fundau ina scola a Sondrio, che ei aver tut iu a piarder gia 1799.

Aunc biars nums cul meglier renum audan en quella perioda della fluriziun dil baroc. P. Carli Decurtins, in preziau scribent

precedent de tarlischur. Il diember dils paders fuva aunc encunter 20, avunda per la tgeua claustra els cuolms. Il pli enconuschent avat ei staus il Tessines Columban Sozzi (1764—85), in um fetg perdert e spirtus. Sco cau della Ligia Grischa e sco patrun de dus pass alpins ha el giu ina impurtonta influenza politica, perfin a Viena ed a Ruma, nua che sias visetas fuvan fetg beinvegnidas. L'jerta spirtala digl avat ei en enqual grau igl original pader Placi a Spescha staus (1752—1833),



Ils „huns“.

ascetic e poet religios, P. Maurus Venzin, igl auctur de bunas scartiras giuridicas per defensiun della claustra, P. Adelgott Dürler, in bien pictur, e buc en davosa lingua bein enqual frater laic, che han furniu fetg gustusas lavurs en lenn e fier ed han era gidau, cu autras claustras ein vegnidas baghegiadas da niev, sco p. ex. Nossadunnaun, Mariastein, etc. Igl emprem frater laic ei P. Fridolin Egger staus, (morts 1709) dal qual ins vesa aunc maletgs en jeli a Muster, Rabius, Trun. El demuossa energic slontsch en lingias e colurs, sco era ella composiziun — in ver artist dil baroc.

Il 18. tschentaner ha aunc purtau ina pintga fluriziun sco supplement dil temps

che ei vegnius mess en ina lingua cun ils megliers umens della scienza de siu temps, sco scrutatur della natira ed alpinist, sco culturhistoricher e filantrop.

Aschia ha il ruver claustral, che ha bess sia umbriva protegenta sin la s. fontauna della cardientscha, schebein ch'ella ha piars perfin la pli biala roma della cruna el stemprau dil 16. tschentaner, mai piars sias fermas ragischs. Il cuntrari, il stemprau ha rinforzau el, ed el 17. e 18. tschentaner ha el catschau novas frastgas e rasau ora sia roma sur l'entira tiara. Buca de smervegliar, eis el gie plantaus dal maun de s. Sigisbert e bognaus dal saung de s. Placi. —



### 3. „Gia morta, nova fluriziun“.

La mumma-claustra digl uorden de s. Benedetg, Monte Casino, ha elegiu per ella la biala devisa: Succisa virescit! Gia morta, nova fluriziun.

La medema devisa astga era nosa claustra scriver sin sia arma, per quei che disfortunatas, mendras che zacu forsia dapi tschentanners, han ual el niev temps zuccadiu e strembliu la veglia plonta.

Le revoluziun franzosa ha bess sias undas era en nosa allontanada val alpina. General Loison ei vegnius cun ina armada franzosa sur il Cuolm d'Ursera en la Surselva grischuna. Ins ha bein bess el a funs ils 7 de mars 1799 a Cons (Muster), mo dus dis pli tard han ins stuiu sesuttametter a general Demont. Ils victurs han priu sco preda las custeivladads della baselgia, ed han luentau quellas a Cuera. Per sventira han ins empruau ina surreziun encunter ils franzos, che ei vegnida vendicada criuamein. Claustra e vitg ein vegni intschendrai. Puspei fuva la fundaziun dil pader della Irlandia en tschendra, cun ella medemamein la biblioteca ed igl archiv cun immens materials. Era las possessiuns ella Val Tellina, forsia la mesadad dils beins della claustra, ein ir a piarder. Il decan ei morts d'ina balla franzosa, ils paders fuvan seglientai sin tuts mauns, ils tgeus corridors della claustra vids. —

Mond il bandischau grond Görres aunc suenter entgins onns sut ils mirs ners dal fem della claustra vi, ha el scret melancolicamein sequents plaid en siu diari: „Muster ei aunc adina en malencurada en sias ruinas“. Il davospren-ci-avat de Muster Anselm Huonder 1804—26 ha bein mess neu per part la claustra, mo gia 1846 han las flommas, envidadas d'in maun scelerau, furiau ellas cellas dils paders. Schliats onns han entschiet, e puspei pareva ei che la claustra daventi in desiart. La dispetta dellas famiglias e partidas della Surselva ha era infectau la claustra, nua che bunamein mo fegls della tiara grischuna formavan il convent. Da Cuera vegneva in vent ualti radical, che engrevigiava de passar

en claustra. Per biars fuva ei fatg en e fatg ora, che la claustra vegni sligiada si, e guides ingles han gia priu si quei sco factum en lur text. Ins ha era onns ora buca stgau eleger in avat pervia dil pign diember de conventuals. Mo in pign stemprau aunc ed il ruver claustral fuss staus derschius cun ragischs e tut. — Denton vegliava aunc adina ina veglia guardia sper la fossa de s. Sigisbert e ludava Diu e clamava entras sia oraziun la benedicziun de Diu giu sin la claustra.

„Mo 4 glischs ardan pli en claustra, ed igl ei buca de piarder in'ura, sch'ins vul impedir sia ruina“, aschia ha ei resunau da cumin 1877, e quei clom ha stuiu leventar in echo, derivava el gie da Caspar Decurtins, il giuven um, che fuva „spir fiug, favugn e stemprau“, sco P. Weiss ha detg inagada. Ed eis ei buca stau quei siu „plaid per la claustra“, che ha dau al da quei temps aunc giuvenil student della universitad via e benedicziun en sias lavurs per la cultura e la baselgia! — Quels plaid han entusiasmau pussentamein la fideivladad ella olma dil pievel enviars la casa de s. Placi. La restauraziun della claustra (entschatta 1880) ei d'engraziar ad el, e specialmein als representants dil pievel a Cuera, sco era alla congregaziun benedictina svizzera. Il bandischau avat Adalbert Regli de Muri-Gries ha tarmess siu magister dils novizs, P. Benedetg Prevost a Muster. Bein ha il giuven pader pegliu tema, vesend la gronda lavur che spetgava sin el, mo il plaid digl avat: „Ei setractescha d'ina casa de Diu!“ ha dau la decisiun. La pli abundonta benedicziun de Diu ei da cheu naven stada sur la veglia casa d'oraziun benedictina. Gleiti eis ei era vegniu pli bia conventuals, aschia che P. Benedetg ha igl onn 1888 saviu vegnir elegius sco avat. Sut sia regenza ha ina nova primavera entschiet per la claustra. Il cronist regorda mo vid la consecraziun della nova baselgia-Nossaduna, che sesarva suenter ils plans de Dr. Augustin Hardegger en piena clarezia sur la Crypta, che deriva aunc ord igl 8. tschentaner. La Crypta, nua che claustra e pievel venerescha



da vegl enneu la Mumma de Diu sco Mater misericordiæ, ei daventada ils davos temps in carezau liug de grazia per numerus tgeus pelegrins. La claustra ei vegnida pli ferma intern-ed externamein e siu num ei vegnius propagaus en quasi tuttas tiaras che enconuschan e plaidan il lungatg tudestg, entras las beinenconuschentas poesias eraquintaziuns poeticas de P. Maurus Carnot. P. Maurus ei il cantadur classic de sia patria grischuna, las atgnadads della quala el cultivescha e promova.

Il successur ded avat Benedetg, Bonifaz Duwe della Westfalia (1916 — 1925), aveva manau ventireivlamein la claustra atras ils grevs temps d'uiara e gia fatg las empremas preparaziuns per la pli vasta restauraziun della baselgia de sogn Martin, ch'ina greva malsogna ha decidu el, de surdar il stab de s. Sigisbert, a siu successur, il glarunes avat Dr. Beda Hophan, in pedagog pre-


ziau era en cirkels pli vasts. La pli part dils paders, ca 30, ei occupada en la scola claustrala, e sesprova leu, suenter la devisa diglavat: Dominici scola servitii, de continuar la lavur culturala de lur antecessurs dapi varga tredisch-tschien onns. La scola claustrala a Muster, che consista ord 2 classas realas ed in gimnasi complet, tier il qual ei vegn en cuort in liceum, vegn frequentada da lunsche datier. Ariguard diember de scolars sa ella pervia de munconza de spazi buca concuorer cun auters

instituts, mo ella enquera persuenter ton pli, de influenzir ils giuvens students entras ina solida educaziun cristiana dil spert e dil cor, conform alla veglia metoda benedictina ded educar. La veta famigliara egl internat che resulta ual ord il buca fetg grond diember, igl ei ca 100, sco era il migeivel clima ella altezia de varga 1100 m, han daditg procurau, che la scola claustrala gauda in fetg bien renum.

Nus havein ussa sfegliau atras las davosas paginas della historia claustrala e serrein ella. Ella ha raquintau a nus da temps daditg svani. Tredisch tschien onns ein svani ella perpetnadad, dapi ch'igl jester ord la dira scola de s. Columban ha fitgau siu fest de pelegrin en nossa tiara retica. Mo dapi che sogn Sigisbert ha baghegiu sia cella egl uaul montagnard, han tuts quels 13 tschentanners udiu la sontgapsalmonia sper la ramur dil Rein. Dominus

custodiat te ab omni malo! (Ps. 120) Dieus pertgiri tei era da cheu naven, car εμπrem sanctuari sper il car giuven Rein.

Turneien aunc inagada anavos tier il tgeu sanctuari egl uaul de pegns grischun! Aunc stat la liunga front claustrala avon nos egl, co ella tegn guardia sper las fontaunas dil Rein, surmontada da dus clutgers barocs, las enzennas de nies casti claustral. Nus lein aunc dar sez in'egliada en claustra, egl intern della baselgia e della claustra, en la sala de capetel e della biblioteca. Nus splun-



Sut claustra



tein da curascha vid la porta, nua ch'il „Bruder portier“ retscheiva nus cun siu usitau „Deo gratias“. Bugen vegn el suenter a nossa supplica, mo el dat igl emprem entamaun a

nus in ina cuorta historia della claustra, per che nus saveien sepresentar empauet il maletg della claustra veglia, e capien lu ton pli bein il baghetg ded ussa.



## Maletgs ord la historia dil baghetg.

### 1. La claustra dil temps della renaschientscha carolinga.

Muster ha spindrau nuot dal temps-miez, sche ins vul encurir vegls codices ne archivalias. Il cudisch claustral ha stuiu far atras temps memia burasculus, entiras paginas ein scarpadas ora e piarsas per adina. Mo la crappa della veglia claustra ha resistiu als stempraus e raquentan a nus dals pli vegls temps. Entras las breigias digl archeolog de Basel, Prof. Dr. E. A. Stückelberg, morts da cuort, han ins fatg excavaziuns ella cuort interiura della claustra (1906), ed anflau l'entira situaziun della claustra, sco ella ei vegnida baghegiada igl 8. tschentaner da s. Ursicin. Dapi lu han principalmein las stuccaturas descuvretgas daditg acquistau il dretg post ella historia dil temps vegl; gie Stückelberg ei buca senuspius, de dir: quellas excavaziuns seigien en biars graus las meglieras della Svizzeria, gie della Europa. Ils objects anflai ein ussa en in agen museum della claustra, che sa era vegnir visitaus dal publicum. Numerusas publicaziuns davart d'experts ein gia comparidas surlunder, aschia da Stückelberg sez, da Prof. Rahn e dal conservatur de quella collecziun archeologica, P. Notker Curti a Muster.

Ella cuort interiura della claustra ein oravontut ils mirs de fundament della baselgia veglia cun treis apsidas en fuorma de fiercavagl vegni descuvretgs. Ella part encunter sera della nav steva ina crypta, tier la quala in corridor ualti stretg manava. Ella seza consisteva en ina nischa en fuorma d'ina quarta rucla. Che quei baghetg ei pli vegls, che la baselgia, muossa la finiastra egl ault della nischa, che havess giu negin senn, cu la baselgia de s. Martin sesalzava suren, gia

perquei ch'ella fuva sut il plaun della baselgia. Perinamein dian ils experts, quella caplutta derivi dal 7. tschentaner e Rahn ughegia de dir, quei seigi stau la caplutta sur las fossas de s. Placi e s. Sigisbert! — Sch'igl ei gia enzatgei misterius, de star en loghens aschi vegls e historics, lu tonpli en loghens aschi sogns. Per impedir la ruina dil baghetg, han ins fatg solids mirs entuorn, aschia che l'intrada ei denton aunc libra. La crypta ei, sco la pli veglia scoperta, in impurtont mussament per la vegliadetgna della claustra.

Ed ussa lein nus prender en egl las excavaziuns della baselgia de s. Martin, nua che quella crypta sesanflava. Ils mirs della baselgia ston tuts esser stai ornai cun opulentas stuccaturas e picturas, anflond ins numerusas restonzas, p. ex. fragments de varga 70. tgaus. Ins sto schon ir a S. Maria in Valle Cividale ella Italia-sura, nua ch'ils abundonts ornamentals ein aunc semanteni, per anflar ina baselgia semeglionta a quella de Muster. Bein ei la lavur, correspondend al svilup artistic de lu, buca la pli fina; bucca ed egls ein mo malegiai si, nas e baditschun ein puspei teni plastic, era ils mauns ed ils peis. Enzacontas lingias indicheschan la detta, in rudi igl jess rodund, duas rieras de sandalas en brin-tgietschen, ed il pei fuva finius. Las parts-sut dellas figuras ein stadas ornadas inagada cun inscripziuns, sco igl ambon a Romainmôtiers. Meglier che la lavur figurala ei la lavur ornamentala tier ils artgs, curnischs etc. Tuts models carolins, tschercai da quei temps, sesanflan cheu: rodas de fiug, sco sin las sculpturas de marmel a Cuera